

## Headlines

1. प्रधानमंत्री नरेंद्र मोदी होरें भारत गी आत्मनिर्भर बनाने लेई 9 मंत्र दस्से।
2. पुलस ते सी.आर.पी.एफ आसेआ श्रीनगर शैहर दे लाल चौक इलाके च घेराबंदी करिए तपाशी अभियान चलाया गेआ। इस दरान होटलें दी बी जांच कीती गई।
3. जम्मू-कश्मीर सरकार नै जी.पी.एफ इंस्ट्रुट रेट परतिए रिजर्व कीते न।
4. जम्मू रेलवे डिविजन नै पैहली दिसंबर थमां गेड़ 7 तैहत होर रेल गड़ियां चलाने दा फैसला कीता।
5. मौसम विभाग नै 4 दिसंबर तगर मौसम आमतौर पर खुशक रौहने दी पेशगोई कीती।

<><><><><><>

## PM-9 Mantras

प्रधानमंत्री नरेंद्र मोदी होरें देसै गी आत्मनिर्भर बनाने आस्ते समर्पित 9 संकल्पें दे प्रति लोकें दी प्रतिबद्धता दा आह्वान कीता। इस मौके पर प्रधानमंत्री होरें उडुप्पी च श्री कृष्ण मठ दे श्रद्धालुएं गी बी संबोधित कीता। प्रधानमंत्री होरें अज्ज जि'नें 9 प्रस्तावें दा जिक्र कीता, उंदे चा इक साढ़ी परानी पांडुलिपियें दा संरक्षण बी ऐ।

प्रधानमंत्री होरें इ'ब्बी आखेआ ऐ जे साढ़ा पराना ज्ञान अगली पीढ़ी तगर बी पजाया जाना चाहिदा। उनें भारती लोकें अग्रे अपील कीती ऐ जे ओहू अपनी विरासत ते परम्पराएं कन्नै जुड़ी दियें प्रसिद्ध 25 थाहें दी यात्रा करन प्रधानमंत्री होरें अग्रे आखेआ ऐ जे भागवत गीता जेहड़ी भगवान श्री कृष्ण हुं'दी शिक्षा ऐ, केंद्र सरकार दे मते सारे कार्यक्रमें लेई म्हेशा प्रेरणा स्रोत रेही ऐ।

<><><><><><>

## Srinagar-CASO

पुलस ते केंद्री रिजर्व पुलस बल नै लाल चौक इलाके च घेराबंदी करिए तपाशी अभियान चलाया। तपाशी अभियान बडे मते व्यस्त कारोबारी इलाके च चलाया गेआ। केई सारी टीमें बक्ख-बक्ख होटलें ते गेस्ट हाउस च चानचक्क छापेमारी कीती ते सैलानिएं दे रिकार्ड चैक कीते। इस दरान उत्थुआं दी सुरक्षा बवस्था दा बी आंकलन कीता गेआ। एहू अभियान केई घंटें तगर जारी रेआ। खीरी रिपोर्ट हासिल होने तगर कोई बी संदिग्ध गतिविधि दी जानकारी हासिल नेई होई।

<><><><><><>

## GPF-Revision

जम्मू-कश्मीर वित्त मैहकमे नै माली बरे 2025-26 दी दुई ते त्री तिमाही आस्तै जनरल प्रोविडेंट फंड यानि (जी.पी.एफ) दी ब्याज दर च संशोधन करदे होई इक नमा आदेश जारी कीता ऐ। भारत सरकार नै वित्त मंत्रालय आसेआ हाल च गै जारी कीती गेदी अधिसूचनाएं गी अपनाने दे मगरा जारी कीते गेदे इस आदेश मताबक दमें तिमाही जुलाई थमां सितंबर 2025 ते अक्तूबर थमां दिसंबर 2025 लेई ब्याज दर 7 इशारिया 1 फीसद तैऽ कीती गेई ऐ। संशोधित कीती गेदी दर केंद्र शासित प्रदेश च सभनें जी.पी.एफ ग्राहकं पर लागू होग।

<><><><><><>

## Minister's Roaster

जम्मू-कश्मीर सरकार नै अपने मंत्रियें आस्तै सिविल सचिवालय श्रीनगर च मौजूद रौहने आस्तै दिसंबर 2025 थमां जनवरी 2026 तगर दा रोस्टर तैयार कीता ऐ। इक आदेश दे मताबक सेहत मंत्री सकीना इत्तू दिसंबर म्हीने दी 8 थमां 12 तरीक तगर श्रीनगर सचिवालय च मौजूद रौहडन जिसलै के 15 थमां 19 दिसंबर तगर ट्रांसपोर्ट मंत्री सतीश शर्मा सिविल सैक्ट्रेट श्रीनगर च मजूद रौहडन। एह्दे कन्नै गै मुखमंत्री सुरिंद्र चौधरी गर्मियें दी राजधानी श्रीनगर दे सिविल सैक्ट्रेट च 22 दिसंबर थमां 26 दिसंबर तगर मौजूद रौहडन जदके कृषि मंत्री जावेद अहमद डार 29 दिसंबर थमां 2 जनवरी 2026 तगर श्रीनगर सचिवालय च लोकें आस्तै मौजूद रौहडन ते जल शक्ति मंत्री जावेद अहमद राणा 5 जनवरी 2026 थमां 9 जनवरी 2026 बश्कार श्रीनगर दे सिविल सैक्ट्रेट च लोकें आस्तै उत्थे मौजूद रौहडन।

<><><><><><>

## Kishtwar-Lecture

भारती सेना च शामिल होने सरबन्धी विशे पर इक लैक्चर दा सरिस्ता किशतवाड़ दे सरकारी डिग्री कॉलेज च कीता गेआ। एहदा मकसद युवाएं गी सशस्त्र बल च शामिल होने लेई प्रेरित करना हा। इस दरान युवाएं गी समें दी पाबंदी, नेतृत्व ते राश्ट्र सेवा बारै जानकार बनाया गेआ। इस कार्यक्रम दा सरिस्ता असम राइफल्स आसेआ 10 जेके बटालियन एन.सी.सी भद्रवाह ते जी.डी.सी किशतवाड़ दे सहयोग कन्नै कीता गेआ। इस मौके पर अपने लैक्चर दरान मेजर जनरल अक्षय चत्रावती होरें भारती सेना च शामिल होने बारै केई सारी स्कीमें बारै जानकारी दिती।

<><><><><><>

## Trains-Resumed

उधमपुर-पठानकोट डी.एम.यू ते कटड़ा ते नमीं दिल्ली बश्कार श्री शक्ति एक्सप्रेस सने 4 ट्रेनां पैहली दिसंबर 2025 थमां परतियै शुरू होआ करदियां न। एह रेल गड्डियां 7में चरण तैहत चलाइयां जा'रदियां न। एहदे मगरा 6 चरण आहली रेल गड्डियें गी परतियै बहाल कीता गेआ हा, जेहदे कन्नै जम्मू संभाग च रेल यातायात सामान्य होआ करदा ऐ, जेहड़ा 26 अगस्त गी होई दी भारी बरखाएं ते हाड़ें कारण रेल दे पुलें ते पटरियें गी होए दे नुकसान दे बाद पूरी चाल्ली कन्नै ठप होई गेआ हा। 7में चरण तैहत चलने आहली रेल गड्डियें च इक गड्डी नंबर 14662, इक 22462 ते इक 74906 नंबर आहली रेल गड्डियां शामिल न।

<><><><><><>

## JK Power Progress

जम्मू-कश्मीर नै नमें सिरेया तयार बिजली दी बंड सरबन्धी सैक्टर आली योजना तैहत पूरे प्रदेश च 3 लख 81 ज्हार शा मते स्मार्ट मीटर लांदे होई इस दिशा च 40 प्रतिशत प्रगति हासल करी लैती ऐ। नवम्बर -2020 च रम्भी गेदी इस परियोजना दे तैहत 2026 तगर 9 लख 50 ज्हार स्मार्ट मीटर लाने दा लक्ष्य मित्थेया गेदा ऐ। बिजली विकास विभाग आसेया जारी एकड़े सुधारें दा मकसद- दक्षता च होर सुधार आहनना- बिजली ढांचे गी तगड़ा बनाना ते बिजली सरबन्धी नुकसानें गी घट्ट करना ऐ। ध्यानजोग ऐ जे जम्मू खिते च अजें तोड़ी 1 लख 87 ज्हार जिसलै के कश्मीर च इक लख 93 ज्हार स्मार्ट मीटर लाई दिते गेदे न।

<><><><><><>

## Kashmir Awards

कश्मीर दे दंऊ कुशल कारीगरें रैनावाड़ी दे मंजूर अहमद खान ते अलामगीरी बजार दे ख्वाज़ा नज़ीर अली होरें गी केन्द्री कपड़ा मंत्रालय आसेया दस्तकारियें दी श्रेणी च बड़ी मती प्रतिशठत आले राश्ट्री सम्मान कन्नै नवाजेया गया ऐ। दस्ती तौर पर कलीन बुनने ते सोज़नी कढ़ाई च उत्कृष्टता लेई इनें कुशल कारीगरें गी औंदी 9 दिसम्बर गी नमीं दिल्ली दे विज्ञान भवन च राष्ट्रपति हुंदे आसेया एहू सम्मान भेंट कीते जागंन। इंदे इलावा दंऊ होरनें कारीगरें मशकूर हमीद ते मीर अरशद हुसैन हुंदा बी बशेश जिक्र कीता गया ऐ। अधिकारियें दा गलाना ऐ जे इस सम्मान कन्नै कश्मीर दियें दस्ताकरियें गी घरेलू ते अंतराश्ट्री बजारें च नमीं पंछान हासल होगा।

<><><><><><>

## Ayush Ramban

आयुश मंत्रालय दे तैहत रामबन जिले च आयुश विभाग औशधी आहले बूहटें दे विकास ते राई-बाई गी बढावा देने लेई इक कार्यक्रम दा आयोजन करा'रदा ऐ। औशधी आहले बूहटे लम्मे समें थमां पारम्परिक चिकित्सा च इस्तेमाल कीते जंदे न। एह बूहटे इयै नेंह रसायनें दा उत्पादन करदे न जेहड़े कीड़े- बमारियें ते परजीवियें शा बचांदे न। आयुश मैहकमे दी इस पैहलकदमी दा मकसद इनें बूहटें दी राई-बाई गी मकामी प्रणालियें कन्नै जोड़ना ऐ- जेहदे कन्नै सेहत ते नरोएपन गी बढावा दिंदे होई टिकाऊ राई-बाई प्रथाएं गी बढावा दिता जाई सकदा ऐ।

<><><><><><>

## Weather

जम्मू-कश्मीर च अगले 5 दिनें दरान तापमान च इक थमां 2 डिग्री दी कमी औने दी मेद ऐ। मौसम विभाग नै 30 नवंबर संज्ञा ते पैहली दिसंबर बडुलै मौसम आमतौर पर खुशक रौहने दी पेशगोई कीती ऐ। उआं 4 दिसंबर तगर गास आमतौर पर खुशक रौहग। 5 दिसंबर गी दपैहरी मगरा गासै पर बहल छाई सकदा ऐ ते कश्मीर खित्ते ते जम्मू खित्ते दी किश थाहें पर दरम्याने दर्जे दी धुंध छाई सकदी ऐ।

<><><><><><>

## Ex Service Meet

सेना नै पुंछ दे लसाना च इक साबका सैनिक सम्मेलन दा आयोजन कीता। इस कार्यक्रम च आगो दलागो दे 15 साबका सैनिकें बड़े उत्साह कन्नै हिस्सा लैता। इस कार्यक्रम च बक्ख-बक्ख कल्याणकारी चैंताएं, पेंशन सरबन्धी मुद्दें, मेडिकल सरबन्धी जरूरतें, रोजगार दी मदद ते दिग्गजें गी पेश औने आहली होरनें चुनौतियें गी दूर करने लेई सरबन्धी चर्चा कीती गई। इ'नें चर्चाएं ते सुझाएं च साबका सैनिकें दी भलाई-बेहतरी च सुधार आस्तै सहयोग कन्नै कम्म करने दे आपसी संकल्पें गी उजागर कीता गेआ।

<><><><><><>